

ՆՈՐ ՍԵՊԱԳԻՐ ԱՅԲՈՒԲԵՆ  
(Կարմիր բերդի առեղծվածային սեպագիր արձանագրության շուրջ)

ԱՐՏԱԿ ՄՈՎՍԻՍՅԱՆ

Համաշխարհային քաղաքակրթության գլխավոր բնօրրաններից մեկի՝ Առաջավոր Ասիայի մասը կազմելով, Հայաստանն արդեն տվել և դեռևս կարող է տալ բազմաթիվ անակնկալներ՝ կապված Հնագույն քաղաքակրթությունների ուսումնասիրության հետ: Այդպիսի մի իրադարձություն կարող է դառնալ Հայաստանի նախաուրարտական ժամանակաշրջանի կիկլոպյան ամրոցներից մեկից հայտնաբերված առեղծվածային սեպագիր մի արձանագրության վերծանությունը, որն իր հետ կարող է փոփոխություններ բերել Հին Աշխարհի պատմությանը վերաբերող մեր գիտելիքներում:


Երևանից Եղվարդ տանող ճանապարհին, Զովունի գյուղի մոտակայքում, Հրազդան գետի աջ ափին պահպանվել են կիկլոպյան ամրոցի մնացորդներ՝ մի քանի հարյուր գամբարաններից բաղկացած դամբարանադաշտով, որից ներքև, Հրազդանի կիրճին հակված հրվանդանի վրա պահպանվել է վաղ միջնադարյան կիսավեր մի ամրոց, ինչը վկայում է, որ Հնավայրում կյանքը հարատևել է նաև այդ ժամանակաշրջանում: Դամբարանադաշտի ուսումնասիրությունը սկսվել է դեռևս 1896 թվականից, երբ Պ. Ջարկովսկու կողմից պեղվեց 22 դամբարան: Հնավայրում 1903 թվին պեղումներ են կատարել Մ. Զաքարյանը, իսկ 1904-ից՝ է. Ռյոսլերը, որն ուսումնասիրել է նաև իր նախորդի պեղած նյութերը: Խորհրդային իշխանության տարիներին Կարմիր բերդում պեղումներ են իրականացրել Բ. Պիտրովսկին (1934 թ.), Հ. Մարտիրոսյանը (1962 թ.) և Ս. Եսայանը (1965-1967 թթ.): Մինչև 1960 թ. պեղված նյութերի և դրանց վերաբերյալ արխիվային փաստաթղթերի ուսումնասիրությամբ ղրաղվել է Կ. Կուչնարյովան: Հնավայրի մի քանի հարյուր գամբարաններից հայտնաբերված նյութերը (խեցեղեն, մետաղյա զենքեր, պերճանքի առարկաներ և այլն) թվագրվում են միջին, ուշ բրոնզի և վաղ երկաթի գարաշրջաններով (մ.թ.ա. XXIV–IX–VIII դարեր): Կիկլոպյան ամրոցը թվագրվում է վաղ երկաթի դարով (մ.թ.ա. XII–IX–VIII դարեր)<sup>1</sup>:

Ամրոցի պատմական անունը, ցավոք, չի պահպանվել: Ժողովրդի մեջ այն հայտնի է Կարմիր բերդ անվամբ: Հնագիտական գրականության մեջ

1 Հնավայրի և կիկլոպյան ամրոցի ուսումնասիրության մասին մանրամասն տե՛ս Կ. Խ. Կ ւ յ շ ի ա ռ Ե Վ. Тазакендский могиальник в Армении. — Советская археология, 1960, N 1, с. 137–147; А. А. М а р т и р о с я н. Армения в эпоху бронзы и раннего железа. Ереван, 1964, с. 47–56; Ա. Փ ի լ ի պ ո ս յ ա ն. Կարմիր բերդ. Հայկական սովետական հանրագիտարան. Հ. 5, Երևան, 1979, էջ 331: Ս. Ա. Ե ս ա յ ա ն. Հայաստանի հնագիտություն. Հ. 1, Երևան, 1992, էջ 173–174 (նաև դրանցում հղված գրականությունը):

դամբարանադաշտը հայտնի է մոտակա Թագաքենդ գյուղի անունով, որը ևս որևէ կապ չունի ամրոցի պատմական անվան հետ:

Սեպագիր այս արձանագրության մասին գիտական առաջին (և միակ) հրատարակումը եղել է 1976 թվականին «Պատմա-բանասիրական հանդեսում»: Երկրաբան Հայկ Աղիզյանը, ներկայացնելով համառոտ մի հաղորդում, համապատասխան մասնագետների ուղադրությունը հրավիրեց առեղծվածային սեպագիր հուշարձանին՝ որոշելու արձանագրության լեզուն և ժամանակագրությունը՝ նշելով, որ այն կրող «քարը դրված է ոչ թե վաղ միջնադարում կառուցված կրաշաղախով պատի, այլ ավելի հին՝ կիկլոպյան անշաղախ պատի շարվածքում»<sup>2</sup>:



Նկ. 1

Դժբախտարար, հետագա տարիներին այս արձանագրությունը ուղադրության չարժանացավ: Առանց որևէ հիմնավորման՝ այն բանավոր զրույցներում պիտակվում էր «կեղծ», թերևս, միայն այն պատճառով, որ սեպագրի նման տեսակ աշխարհի ոչ մի այլ տեղում հայտնի չէր: Թե որքան անհիմն ու չարդարացված է նման մոտեցումը, կարծում ենք, կարիք էլ չկա հանգամանորեն բացատրելու, այդպիսի տրամաբանությամբ «կեղծ» պետք է համարվեին բոլոր գրային համակարգերի հայտնաբերված առաջին հուշարձանները:


Արձանագրությունն ուսումնասիրելու նպատակով 2000 թ. եղանք հնավայրում: Ինչպես նկարագրված էր Հ. Աղիզյանի 1976 թ. հաղորդման մեջ, արձանագրված քարը (լուսանկարը և գծանկարը տես նկ. 1) գտնվում

<sup>2</sup> Հ. Աղիզյան. Նամակ խմբագրությունը. «Պատմա-բանասիրական հանդես», 1976, N 3, էջ 276:

է կրկնույլյան ամրոցի մուտքի շարվածքում՝ ոչնչով չտարբերվելով մյուս քարերից (բացի արձանագրված լինելուց):

Արձանագրությունը փորագրված է գորշ տուֆե քարի վրա, որն ունի 155 սմ լայնություն, 79 սմ բարձրություն, իսկ հաստությունը տատանվում է 75-88 սմ միջև: Բաղկացած է երեք հորիզոնական տողերից, որոնցից առաջին երկուսը գրված են քարի գրեթե ողջ լայնությամբ: Երրորդ կարճ տողը (10 սեպանիչ) մեկ երկար հորիզոնական սեպագծով անջատված է վերին երկուսից՝ զբաղեցնելով քարի միայն կենտրոնական շրջանը: Առաջին տողի երկարությունը 122 սմ է, երկրորդինը՝ 131 սմ, երրորդինը՝ 30 սմ: Երեք տողերի ընդհանուր բարձրությունը 37 սմ է:

Սեպանշանները չափերով շատ ավելի մեծ են Հայաստանում լայն տարածում ունեցող (շուրջ 600 բնագիր) բիայնական (ուրարտական) սեպագիր նշաններից: Մեծ սեպանշանների երկարությունը 5-7 սմ է: Ընդ որում, արտաքին տեսքով դրանք նման են ոչ թե միջագետքյան մեխանման նշաններին, այլ բիայնական սուրանկյուն-եռանկյունու տեսք ունեցող սեպագրերին, որպիսիք առաջին անգամ հայտնի են Վանի թագավորությունում, իսկ վերջինիս անկումից հետո՝ Աքեմենյան աշխարհակալությունում:



Նկ. 2

Քարին փորագրված է ընդհանուր առմամբ 90 մեծ ու փոքր սեպանիչ: Արձանագրության ուղադիր զննումը և նշանացանկի կազմումը ցույց են տալիս, որ արձանագրված են շուրջ երկու տասնյակ նշաններ, որոնցից մի քանիսը կրկնվում են մինչև վեց անգամ (նշանացանկը տե՛ս նկ. 2): Ստույգ չենք նշում նշանների թիվը, քանի որ կան հնարավոր կոմբինացիաներ, որոնք կրկնվում են մի քանի անգամ և դժվար է ասել՝ գործ ունենք մեկ բաղադրյալ նշանի, թե մի քանի պարզ նշանների հետ (տե՛ս նշանացանկի երկրորդ մասը):

Նշանների կազմության սկզբունքը բավականին սլարզ է. այդ սկզբունքի տրամաբանությամբ էլ կազմել ենք ներկայացվող նշանացանկը: Ամենաբարդ նշանը քառաբաղադրիչ է:

Արձանագրությունը փորագրելուց առաջ նախօրոք տողագծում չի կատարվել, փոքր նշանները զետեղված են տողի ինչպես վերին, այնպես էլ միջին ու ստորին մասերում, իսկ որոշ նշաններ՝ տողից վեր:



Գրուած յան ուղղութիւնը, դատելով հորիզոնական դիրք ունեցող երկար սեպանշաններէ դիրքից, ուղղված է եղել ձախից աջ, այսինքն՝ ունեցել է նույն ուղղութիւնը, ինչ սեպագրի բոլոր հայտնի տեսակները (այդ թվում՝ Հայկական լեռնաշխարհում կիրառված ասուրա-բաբելոնյան և բիւսանական (ուրարտական) սեպագրերը):

Արձանագրութեան գրաբանական վերլուծութիւնը (գրութեան ուղղութեան, նշաններէ կրկնութեան հաճախականութեան, դրանց մտաւոր թվի, դիրքի, կազմութեան սկզբունքի և այլնի պարզաբանումը) ցույց է տալիս, որ այն լիովին համապատասխանում է գրային մտածողութեան համընդհանուր, այդ թվում՝ Հին Աշխարհի սեպագիր համակարգերում ընդունված օրինաչափութիւններին: Այսինքն՝ չկա որևէ հիմք արձանագրութիւնը «կեղծ» որակելու համար:

«Կեղծ» լինելու ենթադրյալ միտքն իր ուժն ավելի կորցրեց, երբ սեպագրագետ Հովհաննէս Կարազոյզյանից տեղեկացանք, որ ներկայումս Հրազդան քաղաքի սահմաններում գտնվող Մաքրավանքի հուշարձանախմբի տարածքից գտնվել է նույնատիպ սեպագիր արձանագրութեան մի բեկոր, որը ժամանակին հայտնաբերել էր Սուրեն Շտիկյանը: Հ. Կարազոյզյանը մեզ տրամադրեց արձանագրութեան նույն չափերով արված մի պատճեն, որն ուղղակիորեն հիշեցնում էր քննարկվող արձանագրութիւնը: Բավական մեծ հեռավորութեան վրա նույնատեսակ երկու արձանագրութիւններէ առկայութիւնը մղում է մտածելու նոր գրային համակարգի գոյութեան կամ գոնէ նման մի համակարգ ստեղծելու փորձի մասին:

Եռատող արձանագրութեան մեջ շուրջ երկու տասնյակ նշաններէ կիրառութիւնը թույլ է տալիս ենթադրելու, որ գործ ունենք սեպագիր այբուբենի հետ: Մինչ օրս հայտնի են երկու սեպագիր այբուբեններ, որոնք ստացվել են բառավանկային սեպագրութեան պարզեցման շնորհիվ՝ ուգարիթյանը (մ.թ.ա. XIV—XIII դդ.) և արեւմտեանը (մ.թ.ա. VI—IV դդ.)<sup>3</sup>: Վանի թագավորութեան սեպագիր համակարգը ևս ստացվել է միջագետքյան սեպագրութեան (շուրջ 600 նշանից բաղկացած բառավանկային համակարգի) պարզեցման արդիւնքում, սակայն չի հանգել այբուբենի մնալով մոտ 200 նշանից բաղկացած բառավանկային համակարգ: Թե ինչու Հայաստանում հայտնաբերված սեպագիր այբուբենը չի ստացել լայն կիրառութիւն, գովար է ասել:

Ո՞ր ժամանակաշրջանով կարելի է թվագրել արձանագրութիւնը:

Ինչպէս նշվեց, դեռ մեզանից առաջ ուշադրութեան էր արժանացել արձանագրութեան կիկլոպյան ամրոցի շարվածքում գտնվելը, ինչը կողմնորոշում է մեզ դեպի մ.թ.ա. XII—IX—VIII դդ.: Վաղ միջնադարով թվագրումը քիչ հավանական է, քանի որ Հայաստանում սեպագիրը դադարում է կիրառվելուց մ.թ.ա. VII դդ., իսկ մ.թ.ա. III—II դդ. գործածվում են հունական ու արամեական, մ.թ. V դ. սկզբից հայկական այբուբենները: Սեպագիր այբուբենի ստեղծման ժամանակաշրջանի առավել հավանական թեկնածուն կիկլոպյան ամրոցի թվագրումն է: Հօգուտ այդ կարծիքի կարող է խոսել արձանագրութեան ամրոցի մուտքի պատի մեջ գրված լինելը, ին-

3 Д. Д и р и н г е р. Алфавит. М., 1963, с. 223—227, 243—245; И. Ф р и д - р и х. История письма. М., 1979, с. 121-126, рис. 174, 176.

չից կարելի է ենթադրել նաև վերջինիս՝ ամրոցի հիմնադրման վկայագիր լինելը: Այդ գեպքում քննվող սեպագիր այբուբենը ժամանակագրորեն կրնանի ուզարիթյանի և աքեմենյանի միջև:

Եթե հաստատվի մեր եզրակացությունը՝ կապված ամրոցի հիմնադրման հետ, կարելի կլինի դրանից բխող այլ ենթադրություններ անել, որոնք հետագայում կարող են թե՛ հաստատվել, թե՛ մերժվել: Երկու տողերը երրորդից առանձնացված են մի երկար սեպագծով, որի տակ առկա է համառոտ մի գրություն: Կարելի է ենթադրել, որ առանձնացվածն ամրոցի անունն է: Ցավոք, մեզ հասած սկզբնաղբյուրներում (որքան մեզ հայտնի է) չի պահպանվել Կարմիր բերդի պատմական անվանումը, ինչը օգտակար կլիներ վերծանություն ընթացքում: Նշենք ուշագրավ մի պահ, որը գուցե օգնի հետագայում բացահայտումներ կատարելու: Նշանացանկի վերջում բերված հնարավոր կոմբինացիան կրկնվում է և՛ առաջին, և՛ երրորդ տողերում: Եթե ենթադրենք, որ վերջինս ամրոցի անունն է, որը կարող էր կազմվել իր հիմնադիր արքայի անունով, ապա առաջին և երրորդ տողերում կրկնվողը կարող է լինել հենց նրա անունը:

Այսքանով առայժմ սահմանափակվում են մեր նախնական դիտարկումները, որոնք ի մի բերելով կարելի է անել հետևյալ եզրահանգումները.

ա/ Հայաստանում առկա է նոր սեպագիր համակարգ, որը լիովին տարբերվում է մինչ օրս աշխարհում հայտնի սեպագիր մյուս համակարգերից,

բ/ այն, ամենայն հավանականությամբ, եղել է սեպագիր այբուբեն,

գ/ դատելով փաստերից՝ գրային համակարգը ստեղծվել է մ.թ.ա. XII–IX/VIII դդ., թեև չի բացառվում թվագրման հնարավոր այլ տարբերակ,

դ/ արձանագրությունը կարող է վերաբերել ամրոցի հիմնադրմանը, իսկ առաջին և երրորդ տողերում կրկնվող նշանախումբը հիմնագիր-արքայի անունը լինել:

Հետագա ուսումնասիրությունները կարող են հանգեցնել արձանագրության վերծանությանը, ինչը մեծ արժեք կունենա ոչ միայն հայագիտության, այլև գրաբանության համար ընդհանրապես, վեր հանելով գրային համակարգերից ամենակատարյալին՝ այբուբենին անցման առաջին փորձերից մեկը, որը կատարվել է Հայկական լեռնաշխարհում:

## НОВЫЙ КЛИНООБРАЗНЫЙ АЛФАВИТ?

(О загадочной клинообразной надписи из Кармир Берда)

АРТАК МОВСИСЯН

### Р е з ю м е

В статье рассматривается загадочная клинообразная надпись из Кармир Берда (по дороге Ереван – Егвард) на стене у входа в доурартскую циклопическую крепость. Предварительные итоги исследования показывают, что надпись сделана на до сих пор неизвестном науке клинообразном алфавите, который, по-видимому, был создан в XII – VIII вв. до н.э. (возможна и иная датировка).

Сделанный анализ предполагает возможность дальнейшего проведения работ с целью расшифровки надписи.

#### A NEW CUNEIFORM ALPHABET?

(About the mysterious cuneiform inscription from Karmir Berd)

*ARTAK MOVSISYAN*

#### S u m m a r y

The article makes a close study of the mysterious cuneiform inscription from Karmir Berd (on the road Yerevan–Yeghvard), which is inscribed on the entrance wall of the pre-Urartian Cyclopean fortress. According to the preliminary researches the inscription is written with an unknown alphabet, created most likely in the period from the 12th to the 8th century B. C. (other dates are not excluded, too). The investigation carried out in the article allows to further the researches of its deciphering.